

DOMENIE VI «VIE PAL AN»

Antifone di jentrade cf. Sal 30,3-4

Viôt di jessi par me, Diu, une crete che mi pare,
parcè che tu tu sêts la mêt fuarce e il gno ripâr;
par rivuart dal to non tu mi indreçarâs.

Colete

Diu, che tu disis di fermâti vulintîr tai cûrs onescj e sclets,
danus la gracie di jessi propit cussì,
par che tu ti indegnis di fâ di nô la tô cjase.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Lv 13,1-2.45-46

Il levrôs al à di stâ dibessôl, al à di sistemâsi fûr dal campament.

Dal libri dal Levitic

Il Signôr i disè a Mosè e a Aron: «Cuant che un al à su la piel dal cuarp un sglonfidugn o une gruse
o une tacule blancje ch'e fasi scrupulâ une plae di levre, si à di menâlu dal predi Aron o di
cualchidun dai predis siei fîs.

Il levrôs ch'al à cjapade la levre al larà ator vistît a sbrendui e cence nuie sul cjâf, si taponarà la
barbe e al berlarà: Soç! Soç! Al sarà soç fintremai ch'al varà la plae; al è soç, al à di stâ dibessôl, al
à di sistemâsi fûr dal campament.

Peraule di Diu.

SALM RESPONSORIÂL dal Salm 31

R. La tô salvece, Signôr, mi colme di gjonde.

Furtunât chel che i è stât perdonât il pecjât,
che i è stade taponade la colpe.

Furtunât l'om che il Signôr no i met in cont la colpe
e che nol à imbroi intal so cûr. R.

Il gno pecjât ti ai fat cognossi,
no ai platade plui la mêt colpe e ti ai dite:
«O ricognòs, Signôr, i miei fai»
e tu tu âs perdonât la tristerie dal gno pecjât. R.

Chel che si fide dal Signôr
lui lu invuluce di gracie.
Gjoldêt tal Signôr e stait contents, int buine,
scriulait ducj vualtris, int di cussience. R.

SECONDE LETURE 1 Cor 10,31-11,1

Cirît di fâ come me, ch'o ai cirît di fâ come Crist.

De prime letare di san Pauli apuestul ai Corints

Fradis, sei ch'o mangjais, sei ch'o bevês, sei ch'o fasêts cualunche altre robe, fasêt dut a glorie di
Diu. No stait a dâ scandal ni ai gjudeos, ni ai grêcs, ni a la Glesie di Diu; cussì come che jo o
procuri di plasê a ducj in dut, cence cirî il gno tornecont ma chel dai tancj, par ch'a rivin a salvâsi.
Fasêtsi miei imitadôrs, come che jo lu soi di Crist.

Peraule di Diu.

CJANT AL VANZELI cf. Mt 9,12-13

R. Aleluia, aleluia.

No son i sans ch'a an dabisugne dal miedi,
al dîs il Signôr, ma i malâts;
jo o soi vignût a salvâ i pecjadôrs.

R. Aleluia.

VANZELI Mc 1,40-45

La levre si slontanà di lui e al fo smondeât.

Dal vanzeli seont Marc

In chê volte, i va dongje di Gjesù un levrôs e lu pree in zenoglon disint: «Se tu vuelis, tu puedis smondeâmi». Sintintsi a strenzi il cûr, Gjesù al slungjà la man, lu tocjâ e i disè: «Sì, lu vuei; che tu sedis smondeât!». E a colp la levre si slontanà di lui e al fo smondeât.

Po dopo cun muse dure lu mandà vie disint: «Viôt di no dî nuie a dinissun; pluitost va a fâti viodi dal predi e ufrîs, in testemoneance par lôr, ce che Mosè al à ordenât pe tô purificazion». Ma chel, saltât fûr di li, al tacâ a contâ cence soste e a publicâ il fat, di mût che Gjesù nol podeve plui jentrâ libar intune ciât, ma al restave lontan, tai puescj plui fûr di man. Cun dut a chel, par altri, la int e coreve di lui di ogni bande.

Peraule dal Signôr.

Su lis ufiertis

Cheste nestre ufierte, Signôr, che nus fasi tornâ monts e gnûfs
e ur siguri un'eternitât furtunade
a di chei ch'a fasin la tô volontât.

Par Crist nestri Signôr.

Antifone a la comunioñ cf. Sal 77,29-30

Lôr and àn mangjât fin passûts
e Diu al à sodisfate la lôr brame;
la lôr gole no je stade deludude.

O ben: Zn 3,16

Diu i à volût tant di chel ben al mont
ch'al à dât so Fi, l'Unigjenit,
par che ducj chei ch'a crodin in lui no perissin
ma a vedin la vite eterne.

Daspò de comunioñ

Daspò di vénus sostentâts cul pan dal cîl,
danus, Signôr, la gracie
di vê simpri fan des robis che nus sigurin la vere vite.
Par Crist nestri Signôr.